



ԵՐԵՎԱՆԻ ՔԱՂԱՔԻ ԱՌԱՋԻՆ ԱՏՅԱՆԻ ԸՆԴՀԱՆՈՒՐ
ԻՐԱՎԱՍՈՒԹՅԱՆ ՔԱՂԱՔԱՑԻԱԿԱՆ ԴԱՏԱՐԱՆ
ԷՐԵՐՈՒՆԻ ՆՍՏԱՎԱՅՐ
(ՀՀ, համայնք ԵՐԵՎԱՆ, ԷՐԵՐՈՒՆԻ, ԽՈՐԵՆԱՑՈՒՒ Փ., մասնաշենք 162Ա)



ՈՐՈՇՈՒՄ

Գործի վարույթը կարճելու մասին

ԵԴ2/3935/02/24
2 Հուլիս 2024թ

ք. Երևան

ՀՀ Երևան քաղաքի ընդհանուր իրավասության քաղաքացիական դատարանը՝ նախագահությամբ դատավոր Դանիել Մխչյանի, քննության առնելով թիվ ԵԴ2/3935/02/24 քաղաքացիական գործի վարույթը կարճելու հարցը՝

ՊԱՐԶԵՑ

«ՄՏԿ» ՓԲ ընկերությունը (այսուհետ՝ նաև Հայցվոր կամ Ընկերություն) էլեկտրոնային եղանակով հայցադիմում է ներկայացրել Երևան քաղաքի ընդհանուր իրավասության քաղաքացիական դատարան (այսուհետ՝ նաև Դատարան) ընդդեմ պատասխանող «Գազարոմ Արմենիա» ՓԲԸ-ի (այսուհետ՝ նաև Պատասխանող կամ Գազարոմ), ինքնուրույն պահանջ չներկայացնող երրորդ անձ Հայաստանի Հանրապետության հանրային ծառայությունները կարգավորող հանձնաժողով ՊՄ-ի, հայցելով՝ անվավեր ճանաչել «Գազարոմ Արմենիա» ՓԲԸ-ի կողմից վերջինիս կարիքների համար «G6 տեսակի բնական գազի կենցաղային հաշվիչների» ձեռքբերման նպատակով հայտարարված №175/GArm/24_4.3_016/02.05.24 ծածկագրով (այսուհետ՝ նաև Ծածկագիր) մրցակցային ընտրության հրավերը (այսուհետ՝ նաև Հրավեր):

Հայցվորը ներկայացրել է նաև միջնորդություն գործով դատական նիստ հրավիրելու մասին:

Դատարանը 23.05.2024 թվականին կայացրել է որոշում հայցադիմումը վերադարձնելու մասին:

Հայցվորը հայցադիմումը վերադարձնելու մասին որոշումը ստացել է 23.05.2024թ.-ին և հայցադիմումը կրկին ներկայացրել է 27.05.2024թ.-ին:

Դատարանը 29.05.2024 թվականին կայացրել է որոշում հայցադիմումը վարույթ ընդունելու, պատասխանողից ապացույցներ պահանջելու և դատական նիստ նշանակելու մասին:

Պատասխանողը 03.06.2024 թվականին ներկայացրել է հայցադիմումի պատասխան:

Հայցվորը 01.07.2024թ. ներկայացրել է գործի վարույթը կարճելու մասին միջնորդություն՝ ՔԴՕ 182-րդ հոդվածի 1-ին մասի 7-րդ կետի հիմքով:

Դատարանը գտնում է, որ միջնորդությունը ենթակա է քավարարման՝ հետևյալ հիմնավորմամբ.

ՀՀ քաղաքացիական դատավարության օրենսգրքի (այսուհետ՝ նաև Օրենսգիրք) 12-րդ հոդվածի 2-րդ մասի համաձայն՝ գործին մասնակցող անձն իրականացնում է իր դատավարական իրավունքները, տնօրինում է դատական պաշտպանության միջոցները և եղանակները սեփական հայեցողությամբ՝ օրենքով սահմանված կարգով:

Օրենսգրքի 149-րդ հոդվածի 1-ին մասի համաձայն՝ հայցվորն իրավունք ունի ամբողջությամբ կամ մասնակիորեն հրաժարվել իր պահանջներից մինչև առաջին ատյանի դատարանի կողմից դատաքննությունն ավարտելը:

Օրենսգրքի 182-րդ հոդվածի 1-ին մասի 7-րդ կետի համաձայն՝ առաջին ատյանի դատարանը դատավարության ցանկացած փուլում կարճում է գործի վարույթը, եթե հայցվորը կամ դիմողը հրաժարվել է պահանջից:

Օրենսգրքի 183-րդ հոդվածի 1-ին մասի համաձայն՝ գործի վարույթը կարճելու մասին առաջին ատյանի դատարանը կայացնում է որոշում, բացառությամբ (...):

Նույն հոդվածի 9-րդ մասի համաձայն՝ եթե հայցվորը դատական նիստից դուրս ներկայացնում է պահանջներից հրաժարվելու մասին գրավոր միջնորդություն, ապա առաջին ատյանի դատարանը միջնորդությունն ստանալու պահից տասնօրյա ժամկետում հրավիրում է դատական նիստ՝ պահանջներից հրաժարվելու մասին միջնորդությունը և դատական ծախսերի բաշխման հարցերը քննելու նպատակով: Եթե հայցվորը նիստի ժամանակ պնդում է պահանջներից հրաժարվելու իր միջնորդությունը կամ պատշաճ տեղեկացված լինելու պայմաններում չի ներկայանում դատական նիստին, ապա առաջին ատյանի դատարանը որոշում է կայացնում գործի վարույթը կարճելու մասին:

Նույն հոդվածի 10-րդ մասի համաձայն՝ սույն հոդվածի 9-րդ մասով սահմանված կարգը չի կիրառվում այն դեպքերում, երբ պահանջներից հրաժարվելու միջնորդությունը ներկայացնում է իրավաբանական անձը, պետական կամ տեղական ինքնակառավարման մարմինը կամ որպես ներկայացուցիչ փաստաբան ունեցող ֆիզիկական անձը:

Հաշվի առնելով այն հանգամանքը, որ միջնորդությունը ներկայացվել է իրավաբանական անձ հանդիսացող հայցվորը, Դատարանը գտնում է, որ գործի վարույթը ենթակա է կարճման՝ առանց դատական նիստ հրավիրելու:

Դատական ծախսերի բաշխման հարցի լուծում.

Քաղաքացիական դատավարության օրենսգրքի 183-րդ հոդվածի 3-րդ մասի համաձայն՝ գործի վարույթը կարճելու մասին դատական ակտով լուծվում են նաև դատավարության մասնակիցների միջև դատական ծախսերի բաշխման (...) հարցերը:

ՀՀ քաղաքացիական դատավարության օրենսգրքի 101-րդ հոդվածի համաձայն՝ դատական ծախսերը կազմված են պետական տուրքից և գործի քննության հետ կապված այլ ծախսերից:

ՀՀ քաղաքացիական դատավարության օրենսգրքի 110-րդ հոդվածի 1-ին մասի համաձայն՝ հայցն առանց քննության թողնելու կամ գործի վարույթը կարճելու դեպքում դատական ծախսերի փոխհատուցման պարտականությունը դրվում է հայցվորի վրա, բացառությամբ սույն հոդվածով նախատեսված դեպքերի:

Դատարանն արձանագրում է, որ ՔԴՕ 110-րդ հոդվածի 2-րդ մասով սահմանված բացառությունների բացակայությամբ պայմանավորված դատական ծախսերը կրում է Հայցվոր կողմը, որպիսի պարագայում անդրադառնալով պետական տուրքին, Դատարանը գտնում է, որ Հայցվորի կողմից նախապես վճարված լինելու արդյունքում պետական տուրքի մասով դատական ծախսերի բաշխման հարցը պետք է համարել լուծված:

Վերոգրյալների հիման վրա և ղեկավարվելով ՀՀ քաղաքացիական դատավարության օրենսգրքի 183-րդ, 199-րդ, 200-րդ հոդվածներով՝

ՈՐՈՇԵՑ

1. Քաղաքացիական գործի վարույթը կարճել:
2. Դատական ծախսերի հարցը համարել լուծված:
3. Որոշումն օրինական ուժի մեջ է մտնում հրապարակելու օրվանից մեկ ամիս հետո և կարող է բողոքարկվել ՀՀ վերաքննիչ քաղաքացիական դատարան հրապարակելու օրվանից մեկամսյա ժամկետում:

Դատավոր՝ **Դանիել Մխեյան**